

SINLAI-2

HUNPI THUMTE A PATHIAN DEIH DAN

Thumapi: “Vante’n Pathian thupi dan a theisak ua; huihkua liantak in a khutsuak a sulang hi” (Sam 19:1). Huchi ahih ziak in, Pathian thupina leh a khutsuakte thei ding in vante leh huihkua i sin a ngai. Ahihhangin, i sih matan van a aksite sui mah lehng, mihingte, Pathian deihdan khat leng theilou a sih theih ahi. Pathian deihdan thei ding in a thu i sin a ngai hi.

Pathian thu hoihtak a i sim leh Laisiangthou pumpi Hunpi thum in a khen theih: Pate Hun, Judate Hun leh Khristian Hun ahi uh. Pathian deihdan hiai hunpi thumte chiat ah taklat ahi a, ahihhangin a deihdan a kibang kei. Pathian thu apat in a kibatlouhna bulpi deuhte i chiamteh ding.

I. PATE HUN - Genesis 1:1 apan Eksodas bung 19 tan.

Genesis bung khat apan Eksodas bung 19 tan Pathian in mimal-mal leh sungkuan in a kithuahpih a, sung khat pa pen tuh a sungkuante tung ah siampu bang in a zang. Hiai hun sung ah Pathian in mi khat kiang ah thu khat a pia a, midang khat kiang ah adang. Mimal kiang hiam, sungkuan khat kiang a a thupiakte midang tung ah a kizang kei.

Etsaknate:

1. Pathian in Adam leh Evi kiang ah “Sia-le-pha theihna sing na ne ding uh ahi kei” achi (Genesis 2:17). Adam leh Evi in a ne ua, a gah leng i thei uhi (Genesis 3:1-24). Adam leh Evi chihlauh midang kiang ah hiai thupiak a pe kei.
2. Pathian in Noa kiang ah long suih ding thu a pia (Genesis 6:13-16). Noa chihlauh midang kiang ah hiai thupiak a pia hia leh? Pe lou hial.
3. Huchi mahbang in, Abraham kiang ah Pathian in a tapa a be ding in thu a pia. (Genesis 22:1-2). Abraham chihlauh midang kiang ah tapa a be di’n a ngen hia? Ngen het lou.

Theihluak: I gentaksa mahbang in Pate Hun ah Pathian in mimal hiam, sungkuan hiam kianga a deihdante midang kiang ah a phuut kei a, a mi atuam dungzui in a thupiak atuam hi.

II. JUDATE HUN - Exodus bung 20 apan Nasepte bung 1.

1. Pate Hun a bei kuan in Jakob angel toh zan khat a kisial ua, a zoh ziak in Israel chih in a om (Genesis 32:24-32). Hiai ma kum tampi in Pathian in Abraham kianga na suante nam lian ka suaksak ding a chih bang in, Aigupta a a saltan lai un, Israel tate a hong khanglian ua, nam lianpi a suakta uhi. Aigupta apat a hong pawtkhiak lai un naupang simlauh pasal ngen khe a pai nuai guk (6,00,000) ahi uh (Eksodas 12:37). Aigupta a a om sung un Pathian in a heutu ding un Mosi a sep a, Aigupta apat a pikhiak nung in Israel tate kiang ah a nam pumpi ua ding Dan a pe tuamta hi (Eksodas bung 20). Hiai Dan Mosi zang a a piak ahih ziak in Mosi Dan a kichi a, Israel-te tung kia ah thu a nei a (Deut. 5:1-3, 15), Jentelte tung ah thu a nei pha kei (Rome 2:14).
2. Huchi in kum 1,500 vel Pathian in Israel-te a kithuahpih tuam nawnta a; mimal hiam, sungkuan hiam hita lou in, a nam in a kivaipuakta uhi.

Theihluak: Hiai Dan atuam-tuam in a kilou a, “Thukhun”, “Toupa Dan” ahih-keileh “Mosi Dante” a kichi hi. Huchiin hiai Dan in Judate leh Jentelte kikal ah deihdanna banglai a siamta hi. Hiai Dan, Sinai tang a Mosi in Thupiak 10 a laak apat Nasepte bung 2-na, Pentikost ni tan in a kizang hi (Heb 1:1-2; Eph. 2:15-17; Heb. 8:1-13).

III. KHRISTIAN HUN - Nasepte bung 2 apan Khristian hong nawn tan.

A. Khristian tuh Mosi Dan nuai ah a piang (Gal. 4:4). Himahleh Dan suse dia hong hilou in, hihtangtung dia hong pai ahi zaw (Matthai 5:17-18). Mosi Dante suse lou in, genkholh a om bangbang in a hihtangtung tou zel a (Johan 17:4), khros a hong sih tak in a hihbukimta hi (Johan 19:30; Kol. 2:14).

Chiamteh in: Laisiangthou sintute'n, hiai "Lei leh Van a man masiah Dan thu a sutvom neuchik hiam, thaivom neuchik hiam, khat leng a mang kei hial ding; avek a a tunkim masiah uh" (Matthai 5:18) chih thu ah, a buai sek uhi. A thu a kipdan a hon gen masa a, "Lei leh Van a man masiah Dan thu a sutvom khat leng a mang kei ding; tangtung loupi in" achi hi. Chikchiang a mang ding achi a? Avek a a tun kim chiang in. Bangchik a tungkim in, hihbuchin in a om a? Jesu khros a a sih in (Johan 19:30, Kol. 2:14, Luke 24: 44-46)

Etsakna: Mi khat in lou vaatna di'n Teng 500 hon pe taleh; hiai kilemna tuh lampi nih in a sukbei theih hi. Lou vaat zou loupi in tawp taleh Dan bohsia ahi ding; Kilemna bang a lou a vaat in tuh Dan sutangtung ahi ding hi. Huchi mahbang in, Jesu'n Mosi Dan suse lou in khros ah genkholh a a om bangbang in a hihtangtungta hi. Lou vaatpa'n lou vaat a huai kilemna a hihtangtung a, a sukbei bang in.

B. Jesu'n Dan thute zui kawmkawm a hihtangtung tou zel in, tunung chi'a zat ding Dan thak a pe kawm zel hi.

1. Hiai Dan thak bel leitung a a dam lai in zat ahi nai kei (Heb. 9:16-17). Dan nihna tuh Dan masa om lai in zat theih ahi kei hi.

Chiamteh in: Dan thu (Mosi Dan/Thukhun Lui) pen sutvom neuchik natan a Kalvari a hihtangtung khit a hih tak ziak in Dan si ahita. Dan thu hichi bang a i sui khak ke'n tuh i dinmun mun lauhthawnghuai ahi; Pathian Dante ahun zil in a tuam a, Judate Hun leh Khristian Hun a Pathian deihdan a kibat louh ziak in.

2. Jesu Khris in Pentikost ni'n Khasiangthou hon sawl a (Nasepte 2), apostolte zang in Thukhun Thak tangkoupah in a omta hi. Huai ni mahmah in hiai Dan thak zat ahi pah ngal a, Dan lui tuh Dan thak in a suanmangta hi (Heb. 10:9). Judate'n Thukhun Lui nusia in Thukhun Thak a zuita uh. Jentelte Thukhun Lui ah deidan himahle uh deidan ahi nawnta kei uh (Eph. 2: 11-14).

Thukhun Thak tuh mimal hiam, sungkuan hiam, nam khat ading kia hita lou in khovel pumpi ading ahita (Lk. 24:46-47; Mk. 16:15-16; Nasepte 2:39). A.D. 33 a Pentikost ni apan khovel tawp tan zat ding a hita (Nasepte 2; Matthai 28:20).

Laisiangthou, Hunpi thum a kikhen lam mi'n a theih khelh nak ziak un Laisiangthou a theisiam thei kei uh. Pathian bel a lamdang ngei kei; ahihangin Hunpita chiat ah mihingte kiang a a deihdan leh thupiak a kheng zel. A thudik theih na'ng in a thu diktak a i khen (divide) a ngai hi.

Pate Hun a Abraham, Mosi leh Noa kiang a thupiakte midang tung a kizang lou in suktangtung/hihbukim a om hunhun in a bei zel hi. Huchi mahbang in, Thukhun Lui (Mosi Dan) leng khros a sukbukim a a om tak in a beita hi. Hiai Dan in Thupiak Sawm a huam tel ziak in khenkhatte'n Mosi Dan zat ahi nawn kei chi napi in, Thupiak Sawm pen bel a kizang lai achi uh. Laisiangthou in mun tapi ah Mosi Dan zat ahi nawn kei chih a hon hih. Thukhun Lui (Mosi Dan) khros a kilhlup vek ahi a (Kol.2:14), Thukhun Thak Hun a kizang kha sunte leng Mosi Dan ahih ziak a zat hilou in, Thukhun Thak Dan lak a a tel ziak a Thukhun Thak Dan bang a zat ahi zaw uh chih i theih ding ahi. "Nou Dan a siamtan tumte aw, Khris toh kikhenta na hi uh; hehpihna na puksanta uhi" (Gal.5:4).

SINLAI 2-NA ETKHIAKNA

1. Pathian deihdan thei di'n bang i sin a ngai a?

2. Pathian thu hoihtak a i sim leh Laisiangthou sung pumpi bangzah in a khen theih a?

3. Hunpite min gelh in:

i) _____

ii) _____

iii) _____

4. Hiai Hunpite chiat ah Pathian deihdan a kibang vek hia?

5. Hunpi khatna bang Hun a kichi a?

6. Jesu'n Mosi Dan chik in a hihbukim a?

7. Thukhun Thak Jesu khros a a sih ma in a kizang hia?

8. Thukhun Thak kuate adia piak ahia?

9. Mosi Dan Israelte ading kia ahi kichihna Laisiangthou tang gelh in.

10. Jesu khros a a sih in Mosi Dan sukbei in a omta kichihna Laisiangthou tang gelh in.

11. Jesu'n Mosi Dan suse dia hong hilou a, a sutangtung dia hong ka hi a chihna Laisiangthou tang gelh in.

12. Jesu khros a a sih ma in Thukhun Thak a kizang kei chihna Laisiangthou tang gelh in.
